



LA RIBERA

El que dominara los altos de Campu Sagráu, ente los ríos Lluna y Bernesga, tendría nes sos manes la llave pa tomar Asturies. La tradición diz que, ocupar esti xerru, fue lo que fizo Pelayo depués de la batalla de Covadonga. Dende munchos sieglos enantes yá yera un santuariu relixosu pa tolos ástures.

La Ribera: la llave d'Asturies

Nes tierres de La Ribera ñaz el ríu Órbigu, de les agües del Lluna y del Omañas. La parte alta, la regada pol Lluna, ta integrada polos conceyos de Carrocera, Santa María d'Ordás y Rioseco de Tapia. La baxa, polos de Cimanés del Teyar, Llamas de la Ribera y Carrizu. Una comarca de transición ente la montaña de Lluna y la tierra del Órbigu, que cuenta con una gran personalidá hestórica y que caltién vivos una llarga riestra de vezos tradicionales mui interesantes.

El paisaxe marca, tamién, la diferencia. Dalgo que yá se dexa ver, mesmo, subiendo de Lleón pela autopista. El so accesu al valle de Lluna faise ente los pueblos de Santa María d'Ordás, que se dexa ver al fondu custodiada pol so torrexón, y Rioseco de Tapia, al pie mesmu de l'autopista. La Ribera, como contraste fuerte coles tierres del Páramu y les mesmes de Lleón, ye un tapiz verde domináu por un sotu arboláu. Terrenos de caza, bien conocíos agora polos sos aficionaos, pero tamién reputaos dende l'alta edá media. Pardines, calandries, ferrerinos, raposos, llebres, xabariles... esnalen y cuerren ente carbayales, carrascales, toxales y escobales, buena parte d'ellos tresformaos en choperes de rápidu crecimentu na vera mesma del ríu. Dalgo que tamién ocurre colos pinales. Una inmensa esplotación d'estos árboles ocupa dende va años buena parte de la meseta sobre la que s'alcuentra la ilesia de Nuestra Señora de Campu Sagráu y qu'atraviesa la vieya carretera, agora restaurada, ente Lleón y Oteru de las Dueñas, o la que partiendo d'ella comunica con Rioseco de Tapia.

Al abellugu forestal d'esti impresionante bosque de ribera afáyense 130 especies d'aves, incluyíes les migratories, un datu que conocen bien los aficionaos a la ornitoloxía y nel qu'insisten pa remarcar l'interés d'esti espaciu. Un tierra tamién de sobra conocida polos amantes de la pesca. La trucha ye la reina de les agües. Los cotos trucheros del baxu Lluna y del altu Órbigu son dellos de los más reputaos a nivel internacional. Ecolóxicamente, la zona del entroke del Lluna y del Omañas ye ún de los caberos refuxos de les llóndrigues.

Pelayo

Claudio Sánchez Albornoz da como fecha probable de la batalla de Covadonga la del día d'Arafa del añu 103 de la hénxira, ye dicir, el 28 de mayu de 722. Cuatro años enantes, en conceyu abiertu, los sos convecinos nomaran Príncipe a Pelayo y ésti estableciera en Cangues d'Onís la capital del so Principáu.

El 19 de xunetu de 711 les tropes del beréber Tarik ben Ziyâd cruzaron l'estrechu y desembarcaron na roca que dende aquella conocemos como Xibraltar (Hibel Tarik, la roca de Tarik). Tres años depués, en 714, avérense les tropes árabes pela primer vez a l'Asturies Cismontana, al atravesala camín d'ocupar Galicia.

Los cronistes árabes fálennos con detalle de los sitios de Córdoba y Mérida, pero describen bien de pasada les incursiones a otros llugares. Considerando'l númberu de xente necesario pa ocupar tola península, la guarnición de Munuza al cargu de custodiar Asturies dende Xixón, o la que de xuro quedaría ocupando Astorga, la gran capital de los ástures, entiéndese que nun debieran ser de muncha consideración.

Estes mesmes cróniques árabes malapenes dexaron referencies a la batalla de Covadonga. Poco más qu'una crónica sobre la insurrección d'un "burru montunu" de nome Belay, que ye de xuru'l nuestro Pelayo, y al que nun-y dieron más importancia por tratase d'un llariiegu que poco más que se dedicaba qu'a robar cabres y a escondese depués d'ello en monte.



L'episodiu de la intervención de la Virxen na batalla, anque perteneciente a un relatu posterior, sirve pa dar carácter míticu a la hestoria d'esti periodu. El mesmu carácter míticu que s'alcuentra nes hestories que se cuenten tradicionalmente alredu del santuariu de Nuestra Señora de Campu Sagráu.

Fálase, asina, d'estremaes batalles posteriores a Covadonga y dientro de la dómina del principáu de Pelayo. Una d'elles sirviera pa espulsar a los árabes de les tierres de l'Asturies Tresmontana, l'actual territoriu d'Asturies. La meyor manera de caltener por bastante tiempu estes tierres ayenes a la posibilidá d'una nueva invasión yera ocupar l'actual xerru meseteñu sobre'l que s'afaya'l santuariu de Campu Sagráu. La tradición del llugar fala de la esistencia d'una gran batalla contra los árabes nes sos inmediaciones y que, n'alcordanza del fechu, erixóse'l primer santuariu.

El llugar ye clave y tuvo de selo dende antiguu. A mil cien metros altura y custodiando les dos principales rutes d'entrada a l'Asturies Tresmontana: la que subiendo pel ríu Lluna aportaba a Babia y entraba pelo qu'agora conocemos como'l Camín Real del Puertu de La Mesa, y que nun ye sinon la vía de comunicación prerromana más importante ente'l norte y el sur; y, en segundu llugar, la que remontando'l ríu Bernesga algamaba l'Altu La Carisa y que posiblemente seya la calzada romana más antigua que se conserva nel nuestro territoriu y que fuera otrora la principal vía d'ocupación de les tropes romanes.

La distancia ente dambes calzaes y dambos ríos nel puntu más estrechu nun llega a los venti kilómetros. Nesti llugar, tamién el puntu estratéxicu más eleváu, y a diez kilómetros de cada una de les calzaes y de cada ún de los ríos, s'alcuentra anguañu'l santuariu de Nuestra Señora de Campu Sagráu. Hasta primeros del sieglu XX fuera ún de los centros de pelerinación más importantes de Lleón y Asturies. El mesmu 8 de setiembre, festividá de la Virxen de Covadonga, celébrase la fiesta de la Virxen de Campu Sagráu. La mesma fecha, nos dos casos, pa recordar fechos idénticos, una batalla que nel añu 722 se produxo ente les tropes árabes y les ástures. La mesma hestoria común. Idéntica tierra que defender del invasor.

Tamién, asemeyada tradición relixosa. La propia dedicación del templu a la Virxen, como tamién el nome de la cercana Santa María d'Ordás, qu'enantes se llamara simplemente Santa Mería y que debiera'l nome al agradecimientu a la Virxen de les tropes vencedores de la batalla de Campu Sagráu.

La visita a la ermita y al propiu llugar nel que s'afaya ye obligada. Al norte, la cordelera Cantábrica, impresionante. A escasa distancia, nel restu de direcciones, la inmensa plantación de pinos cubre l'horizonte. Informantes del llugar cuéntenme que baxo esti bosque artificial de pinos australianos s'escuende una serie trece círculos de piedra, formáu cada círculu por ventiocho grandes piedres. Cada ún de los círculos diría presidíu nel so centru por una gran pilastra. Cuenten que debieran de construíes adoradores de la lluna. Tamién que, cuando llegaron los romanos, aquello yá llevaba munchos años ellí.

Toa tradición siempre remite a un posu de verdá. De xuru que, el llugar, enantes de tar custodiáu, como agora, por un magníficu santuariu, bien pudo talo polos círculos de piedra d'una divinidá pasada. Lo estratéxicu del so emplazamientu, lo míticu de les hestories que queden nel llugar, lo místico de la so advocación a la Virxen (y, en concretu, a Nuestra Señora de les Batalles), llama a nun perder de vista esti llugar y a tenelu bien señalizáu nel mapa topográficu de les Asturies.

La lleenda pue pertenecer a delles de les batalles de Pelayo o de Fruela, tanto como a cualquiera de les qu'ocurrieren hasta'l fin del reináu d'Alfonso II. Tamos falando d'un periodu de tiempu de 125 años del que namás queda la memoria de les cróniques que s'escribieron posteriormente. Con más de cien años de distancia, el relatu de los fechos ocurrios, tresmitió y agrandáu de boca en boca, tuvo tiempu de tresformase y de deformase.

Con too, dalgo queda de cierto. Tovía al sucesor d'Alfonso II, Ramiro I, va toca-y ver invadíu'l territoriu de l'Asturies Tresmontana. El so reináu llegó hasta 850. Munchos años pasaran dende la fecha más o menos confirmada de la batalla de Covadonga. En tou esti tiempu, el valor estratéxicu d'un llugar como'l Campu Sagráu nun debió más que dir en aumentu. El mitu del llugar garraba bases fuertes sobre les que caltenese.

La tierra alta

Una buena manera d'entrar en La Ribera ye facelo pela Garganta de los Diablos, ente Portiella de Lluna y el conceyu de Carrocera. Un hermosu y estrechu pasu ente les peñes de Calderones y Cabadones y que sube pela riega del valle de Vallidiellos. Saliendo de Portiella de Lluna siempre tendremos como puntu de referencia, a la drecha, l'Altu la Viesca, de 1826 metros d'altor. Dende'l so cumal la vista al sur algama tolo llargo y maxestuosu de La Ribera y l'Órbigu.

La cabecera del valle afáyase, dende la edá media, custodiada polos torrexones de Tapia de la Ribera, nel conceyu de Rioseco de Tapia, y Santa María d'Ordás, nel conceyu del mesmu nome. Del primeru d'ellos, de planta cuadrada, malapenes se caltién en pie una parede, sostenida polos restos de les dos aneyes. La torre, restu del castiellu de los Tapia, ta vinculada tradicionalmente al heroe de la batalla de Campu Sagráu.

La torre d'Ordás, ríu abaxu, restaurada, ye cilíndrica y conserva'l so espíritu orixinariu de centinela riba una llomba dende la que se domina una amplia estensión del valle. La subida hasta ella paga la pena. Un pindiu senderu remonta hasta la so base. La sensación de fortaleza que, tovía agora, amuesa llama l'atención. Los sos muros de mampostería y morteru, piedres de sillería nes saeteres y silleríes d'arcu y columnines nos vanos de les ventanes. Nel interior añeren les cuerves nos mechinales nos que s'incrutaben les vigues de los estremaos pisos: cinco, según s'aldivina pol númberu d'estos mechinales.

Como nel casu del torrexón de los Tapia, el de los Ordás refier la lleenda de la sangrienta traxedia del asinatu de Don Ares d'Omaña a les manes del so tío Don Pedro Suárez de Quiñones.

L'hestóricu conceyu d'Ordás taba integráu polos actuales conceyos de Santa María d'Ordás y Las Omañas. Anguaño, a pesar de pertenecer dafecho a La Ribera, allúgase Las Omañas dientro de la Comarca de Las Omañas, al considerásele la so cabecera, y tar integrada polos conceyos de Soto y Amío, Riellu, Valdesamariu y Murias de Paredes, que suben pel cursu del ríu del mesmu nome. Alfonso II otorgó esti conceyu d'Ordás a la ilesia d'Uviéu y el Papa Xuan VIII, por bula del 875, confirmó esta demarcación.

Les dellimitaciones comarcales actuales faen que los tres conceyos de la cabecera de La Ribera s'integren dientro de la comarca de Lluna que, a la vez, forma parte de la macrocomarca de los Cuatro Valles.

Llingüísticamente, el ríu Lluna recibe esti nome, pronunciáu con "elle", dende qu'entra per Santa María d'Ordás. Nos conceyos altos del ríu esta "ll" pronúnciase como la nomada "ch vaqueira" y ortográficamente márcase con un puntu ente les dos "eles". Desta manera falamos del cursu altu del L.luna (integráu poles comarques de L.luna y Babia) y del baxu Lluna, qu'encabecen La Ribera.

La tierra baxa

L'altu Órbigu, acabante de fñacer, fórmenlu los conceyos de Cimanos del Teyar, Llamas de la Ribera y Carrizu, tierres de transición ente la montaña y El Páramu, nes qu'apiencen a desdibuxase les característiques de la arquitectura popular en piedra pa dar pasu al adobe (que va pasu ente pasu desapareciendo y dexándose caer les sos construcciones nel más completu de los abandonos).

Una tierra que tovía conserva vives una riestra de tradiciones, como las fogueras, los guirrios y madamas del antruexu, o la indumentaria tradicional. D'ésta cabe destacar la mantilla que cubríela la cabeza de les muyeres, prenda bien elegante de pañufinu negru ribetiada de terciopelu y cinta de seda. Yera una prenda incorporada al vestuariu femeninu a partir del momentu nel que se casaba, como tamién lo yeren los corales del cuello y "las calabazas" de pendientes. El coral siempre fue mui del gustu tradicional pa la formación de collares. La sabiduría popular atribuyía-y poderes sanatorios ("el coral da salú a los vivos y paz a los muertos") y solía dir acompañáu de cruces o medalles de plata. Los pendientes nomaos de "calabaza" consten de dos cuerpos, l'aru y el colgante a manera d'esfera rellenu con seda carmesí pa resaltar los calaos. Tamién yeren característicos los mantones y los manteos, una

especie de rodáu de pañu negru que s'empleaba más que nada nes fiestes y yera una de les prendas de más valor del atuendu femenín.

La “madama completa”, como se noma nesta tierra a la muyer vestida entera cola indumentaria tradicional, sigue lluciendo nes principales celebraciones. Concha Casado ye autora del llibru “La indumentaria tradicional en las comarcas leonesas” y en él afáyase bien estremada esta comarca pol so carácter mantenedor de los vezos.

L'antruexu celébrase cola salida de los guirrios, siendo los más típicos los de Cimanés del Teyar, Velilla de la Reina, Llamas de la Ribera, Carrizu de la Ribera y Sardonéu. El guirriu de Cimanés, con un enorme caperuchu pintu, diba enteru vistíu de blanco, con cuerdes ataes al cuerpu y la cara tapada. Blineaba d'un llau a otru, metiéndose peles casi y los soportales, faciendo sonar les llueques que llevaba colgando y dando variscazos a los qu'atopaba pel camín. A la hora de comer, los típicos frisuelos. En Velilla de la Reina, amás del guirriu, sal el toru, un armazón de madera con cuernos, cubiertu per una sábana blanca. Nesti mesmu llugar, “la gumia”, una especie de mostru que tien por cabeza la calavera d'un caballu, xúntase tamién colos populares home del sacu y l'home de les tenaces. “La gumia” tamién aparez en Carrizu de la Ribera, asina como “la tarara”, una especie de monigote diabólicu con apariencia de bruxa.

L'antruexu comenzaba nestos llugares de sábadu cola “siembra de la cernada”, con tolos presente alreduro d'un fueu, compartiendo la garrafa de vino y cola cara prieta de la cernada de la llume. A los nuevos que diben averándose al fueu y nun llevaben la cara abuxaracada, bautizábaselos aína col vino y poníase-yos la cara a tonu de la de los demás.

Carrizu de la Ribera ye, a les puertes mesmes de les tierres del Órbigu, la entidá principal de población de La Ribera, con dalgo menos de los dos mil habitantes. La ilesia cuenta con portada románica del sieglu XII y nel interior venérase un Cristu góticu del sieglu XIII. Al delláu afáyase'l Palaciu de los Marqueses de Santa María de Carrizu, anguañu La Posada del Marqués. Un perfectu llugar nel qu'aselar pa emprender la visita d'esta guapa comarca o nel que facer un altu depués de visitala. Carrizu cuenta coles comodidades y diversiones propies d'una villa de les sos característiques, lo que siempre-y diera una especial relevancia económica.